

玄覽堂叢書

第六十二冊

福建運司志卷之十四上

規畫志

握計持籌圖事揆策權其輕重施以潤澤與民宜  
之議一功百母作聰明好爲變革志規畫

條議西路

計四十  
一欸

運使姜恩議

一申明舊例以通官鹽查得閩省雖有八府內福  
興泉漳皆產鹽地方自來官鹽不行汀州又通  
廣鹽惟有延建邵三府得通官鹽中間尚有私

鹽攬阻如延平府尤溪永安沙縣等處路通上里涪州出鹽地方豪頑之私聚眾興販私鹽水陸大行經過巡捕巡司關隘索受報水分例公然賣放積慣棚主私牙引領窩頓代賣習爲常故前項縣分皆食私鹽以致官鹽賣少 國課不足先年本院有行着令延建邵三府當該官吏專管鹽法按季繳引巡捕巡司負役限獲私鹽按季該吏赴司轉送比較及 題准事例但遇給由官負布政司查其每年繳過退引有無

完足其有未追引日至二千引以上者不許起  
送例合遵行今後水口分司每幫官鹽賣畢造  
冊回報之時通查三府所屬縣分如有水客買  
鹽數多者卽係私鹽盡絕如無水客名目者卽  
是私鹽盛行就將縣官叅究該吏牙行提問此  
法一行則互相警備而私鹽不敢肆行何患官  
鹽之不通也

運使陶珪議

一議呈水口浮橋撥人看守詳允緣由案查先該

水口分司照得水口私鹽之弊由南臺透過竹  
崎所分裝小船潛住關下二十里地方安仁溪  
先行探聽緝捕人役巡哨遠出寅夜透港又有  
挑擔私鹽悉從關下西岸上山俱至關上塔嶺  
源沙灣口等處地方先納水客接買鹽一到船  
卽時開去踪跡無定是以私鹽盛行節經把港  
官設法緝捕日雖可守夜則難防卷查得立柵  
木以防透港事先該署司事邵武府胡通判將  
關前江面用繩牽量一百九十餘丈內除淺沙

不能行船三十丈議造浮橋三十隻木槓十節  
每船加橫木計四十節共長一百六十丈各用  
木鎮筏纜拴扯上流橫截江面數內仍置活船  
三隻以備早晚放船啓閉估計成造工食料價  
共該銀五十九兩零七分具由備牒本司轉詳  
巡按福建監察御史包 批允動支無礙銀兩  
照數給發完造後因筏纜不能經久續置鐵線  
一條穿係甚爲穩當來往人行各各稱便迄今  
年久不行修理前船朽爛不堪况又節蒙承委

官員交代不常兼以哨夫更換不一漫無責守  
是以洪水泛漲風雨暴作陸續漂流照得浮橋  
完固之日私鹽頗革浮橋已廢之後私鹽復通  
斯橋之設果爲良法足示永圖但其成造之時  
因吝小費使船板脆薄故不堅又看守無法以  
致流失誠爲可惜今欲仍照舊規修復前橋動  
支庫貯銀五十九兩七分給與分司修造橋船  
三十隻必使船板加厚船釘加密務要又遠堅  
固分司督令看守將前船編號哨夫各管領一

隻牙行各總管三隻不致漂流遺失如違責令  
賠造或係日久朽壞分司量行修理如此則防  
守之規既嚴私鹽之弊自革矣蒙巡按福建監  
察御史金 批浮橋之設以禁私鹽且以防盜  
賊通往來甚爲便益俱依擬行

運使童蒙正議

一禁奸宄以杜勢豪先年鹽法廢壞皆由商人自  
將引目及各倉官鹽投獻勢宦仗其威力影射  
夾帶當幫商鹽被其阻滯遂致商本傾喪乃立



法禁革船鹽編幫但有沒官等鹽悉皆均派如  
有投托撓越治以重罪嗣後頗息柰何法又弊  
生奸貪之徒仍復故違交通勢要或妄指無額  
鹽斤具告給票領賣或謀復遠年罪革老引搭  
幫取捷紛紛爭擾况商人中引支鹽守候五年  
方得當幫發賣今此徒奪買票鹽不拘幫次輒  
就發賣既無守候之苦又無餘價之增難易遲  
速居然可見非惟商人失利抑且國課有虧  
且又船重鹽多占賣日久商人幫期愈遭阻壓

合嚴禁革以後各場并南臺等四倉因徒沒官等鹽卽作額外積餘之數照別省運司事例與同正額鹽課一起開中請引母子挨賣不得給票搭幫再將近日各告派剩加封鹽額數目并一切票鹽及遠年罪革老引與搭幫名目盡行除革弊源可絕鹽法自清矣

一革沒官票以疏引目先年本司開設東南二路行鹽引目不敷隨據商人僉呈惠安等場原有違限清查追沒官鹽情願納價給票與引相兼

支用但比因事遠人亡並無實在鹽斤各商因  
缺少引目自願領票買補該本司議將前項沒  
官鹽數每引納價給票聽商自備資本買補鹽  
斤與引相兼照賣呈詳前院批允派商納價刷  
票呈送掛號發司給商遵照兼用外今照近奏  
開中依山鹽引甚可足用非比前年缺乏之時  
使皆舍引用票引目何時而完銷乎合將引目  
責令納價支鹽其票未支者盡行查革候各倉  
場積有沒官鹽斤照各商納過票價扣美給領

食用不得給票照賣以後各倉丹積沒官鹽斤  
候開中之時併請引目查照原議每引價值南  
臺倉三錢閩安倉四錢竹崎倉五錢水口倉八  
錢追價照交換幫發賣庶虛額得以杜絕而引  
課可通矣

署水口分司推官馮成能議

一嚴督察以絕交通照得商人給引中鹽必由閩  
安入港次進入南臺由竹崎所掣驗完畢方行  
換幫駕到水口分司驗船吊賣是水口爲行商

之歸會而閩安鎮則初入之噤喉竹崎所則必  
由之門戶也近來承委官吏率多常例是需與  
商人混若朋儔漫無統紀以致商稍得恃肆志  
販私未至當幫則先賣後補及至吊賣則設計  
渡關奸弊百端不可枚舉原其所自由各處把  
驗皆不得人交通作弊故也今欲各鎮皆擇清  
廉委官勢必難得切照水口原係四品衙門其  
名位本宜統領各處如無正官必慎權委容令  
覺察前路過來鎮所仍行文嚴督若水口盤出

私鹽卽追究從來或入自海港則罪坐閩安鎮  
或止是南臺買來越過內港則罪坐竹崎所各  
吏役兵夫許徑自提問職官許令參究如此庶  
事體歸一而擇委一官之廉可以制各官之貪  
肆矣前件行據該府會同運鹽司議照水口分  
司係西路鹽法會歸相關最重各該把港弁批  
驗所官積弊委應責成督察禁治遇有盤出私  
鹽並聽追究從來之處罪坐所由吏哨弓兵捕  
鹽人役徑自提問職官參究庶祛夙弊又該司

府會審得商人張廷節等呈稱西路正課海船到閩安鎮之後本司告牌前去該鎮批驗所驗放過鎮盤裝溪船到於竹崎又經竹崎批驗所掣摯到於水口分司驗賣此該設立衙門舊規把港官員與所在官司職掌盤獲違禁番貨糾察寇盜或有透港私鹽亦聽捕獲並與官鹽無預近年却將往來貨船與有引官鹽生事尋騙鼓起各衙門首領相率垂涎過於市賈官鹽到鎮既有部院引票又有過鎮紅牌柰何船鹽在

海風汛不常不能盡如期限致被查驗刁難索  
騙稍不從欲輒就拘留呈稟舵延月日漂泊喪  
本苦莫伸辯相沿成例合乞西路官鹽到鎮只  
許遵照舊制聽閩安鎮批驗所印記驗放不必  
會同把港巡司致生刁騙其南港分司把港官  
亦只管賣南港官鹽不必干涉西路鹽法竹崎  
把港官向以報到盤復母船及開幫起剥爲由  
多索常例商稍受害尤當禁止等因據此隨該  
本司議得水口原係運司同知四品印信分司



閩安鎮竹崎所各批驗所俱爲轄屬此設官之  
成憲也近年旣添閩安鎮把港委官及水口負  
缺又委司府首領與各把港官不相轄屬甚至  
倣倣成風誠有如張廷節等所呈者合議西路  
鹽法專一責令水口分司遇有缺負查照先年  
題 准明例選委科目出身廉能府佐若福州  
府缺官卽於旁府選委庶幾官必得人而鹽法  
之綱舉矣其閩安鎮竹崎所旣有批驗所官又  
有巡司官所據添委二處把港弁近日運鹽司

又添坐駕過鎮過所名色俱屬弊蠹相應革免  
獨南港督賣省城食鹽黃崎鎮督賣福寧松溪  
政和等處食鹽各有把港官黃崎鎮議委運司  
副使與三司首領南港議委運司府衛首領相  
兼選用似於事體相宜再照各把港官例於月  
終開具盤獲私鹽船斤數目呈送司道查比今  
查南港始於本年二月內成造該港牛船二十  
隻其黃崎鎮斷幫已久向無官鹽掣賣是私鹽  
盛行明矣不知把港官果何爲者合候詳允督

行運鹽司速督該商造完北港鹽船今後分司  
并各把港官月具賣過鹽幫并盤獲私鹽同開  
送比如鹽幫吊賣足數則是私鹽不行雖無盤  
獲可也如官鹽斷幫雖有盤獲私鹽不准免罪  
其餘防禁事宜並照推官馮成能原議施行  
一禁插幫以釐隱弊照得商人給引支鹽自有成  
課挨幫駕賣亦有定序惟法度一成而不變則  
雖有巧計亦無可施近因奸徒不守成規希圖  
捷徑或以加封刺引爲名告願納價或以失水

遇盜爲藉哀乞補銷其中果係被倭焚燒者固當准令買補但利之所歸詐僞日滋多有失一稱十因公帶私者委官查勘不過憑據里隣而里隣又先受買囑其間朦朧虛捏之弊難保必無其告買囚徒厥底等項不過借立名色倚藉勢豪以遂其越幫競利之私耳雖令先納餘價若足禁奸但恐此端一開漸不可長原議批定每幫止搭二隻卽令服字一幫搭至五隻矣搭幫之船已及正幫之半而加以夾帶之多大踰

常額遂致水客刁難商鹽消溶引日遲延正課  
阻滯且票引亂雜上無一定之制而奸頑相效  
下起爭競之端人見正幫之鹽日久利微而插  
幫之利便而且速則其流之弊將有盡棄正脉  
而爭事旁枝者矣前此祇因軍餉缺乏姑從告  
買以爲濟時之權不知吊賣之鹽止有此數搭  
幫旣多則正幫必少猿臂之勢不能兩通徇權  
宜而廢正法長豪黨而病商人終屬未妥合無  
嚴爲查革除已前申詳 察院批允者姑准完

銷自是刊爲定規每幫止許正船十隻一循一  
環此外永不得以充餉爲名多方告擾若果有  
囚徒厥底沒官當支者必令運司查實分派正  
幫商人均勻接賣亦不許外增號票告買插幫  
則小人僥倖之心自絕而正課易完矣前件行  
據該府會同運司覆議通行清查在前舊票過  
限一年之內者嚴促搭幫賣訖銷繳一年以上  
追奪入官今後並止許行正幫一切照票俱禁  
不用

一防水陸以治販徒照得水口迤邐一帶本處并外郡人民相間雜處人烟頗繁如茅蔡街大義堀大雄等處多有無藉棍徒結黨私販及衙門革退人役倚恃慣熟鹽行交通船戶私透關津又自山溪以東從安仁溪上山小路可達塔嶺茅蔡山溪以西從大雄上山小路可通源沙灣口皆挑山私販之路而關前溪河橫濶往來船隻甚多先年造建浮橋以備早晚放船兼防夜越近被倭賊燒燬無存雖多換橋哨夫人等嚴

加巡緝尤恐奸徒豪黨詭詐萬狀日間衆目所  
視或不敢肆志公行昏夜窺伺無人不無潛通  
竊越若使浮橋不復縱有十耳百日亦自難周  
但造橋之費取足公家則當此匱乏之時似爲  
不急之務而詢及各商皆願自行脩造則上不  
費官下不擾民誠爲公私兩便也况合衆商之  
力以建百金之工則事亦易集而異日橋工一  
成私販禁息商人之利孰大於此是役之以造  
橋者所以利商而非所以厲商也合無俯順輿



情脩復舊制打造浮橋四十隻更造大船四隻  
每十隻中間一大者練以鐵縲蓋以木板着令  
橋夫啓閉關鎖則私鹽從水而通者庶可禁矣  
又於挑山之所嚴督哨夫輪班直日於安仁大  
雄等處日夜哨捕分司置立文簿一扇每五日  
一比仍令互相覺察如有得錢縱放者許諸人  
告發卽賠追犯入所得之錢以充首告之賞又  
令十人爲一哨如十人之中訪有一人賣放者  
十人俱重責處治則小人惟利是趨必不肯顧

恤其黨而其心失利惟害是避亦必不肯偏護其黨而代爲受刑庶橋哨朋奸之弊可以漸除又將水口住民沿戶報名立爲保甲之法如一甲之內藏有私牙通同則小甲比隣俱各責治有能首捕者依律給賞則私鹽之藏頓無所而水陸販徒皆因無主而自息前件行據該府會同運司覆議依行

一過旁曲以行官引照得全閩八府興泉漳三府俱係濱海產鹽故竈戶止令納折商人不行中

支汀州借行廣鹽獨延建邵三府乃官引通行之處而三府之內又多山道潛通販私訪得尤溪永安大田沙縣等處俱食私鹽其鹽徒上里場由莆田僂遊越過建甌壽寧政和松溪等縣亦食私鹽其鹽從海口場由黃崎鎮越過以全省之利俱在三府而又有旁蹊曲徑從而分其利焉如之何官鹽之得行也查得前院題准事例於各府屬縣着清軍官帶管鹽法設立官牙承買官鹽按季繳引誠通商之要法近因此

法廢弛遂致私鹽通行官商告病爲今之計惟  
申明舊制嚴爲禁約行各處巡捕巡司等衙門  
多方緝捕南則謹於僂遊縣北則嚴於黃崎鎮  
與各該巡司給示曉諭地方有能捕獲者加以  
重賞關隘兵夫坐贓問罪仍仰行鹽該縣舉報  
官牙多招水客前來水口報買官鹽其賣過退  
引運司嚴加查繳申報上司如該縣果能按季  
繳引者卽係官鹽通行並無退引繳報者卽係  
私鹽擅利各該掌印巡捕官以此稽其能否勤

惰則私販可阻而公課可充矣前件行據該府會同運司覆議隨查得嘉靖十九年七月初九日奉 都察院巡按福建八百八十一號勘合劄付爲條陳事宜以禪鹽政事該 欽差巡按福建監察御史包 題 准本省行鹽地方僅止三府而三府之中又止行數縣豈民食無鹽哉正以督理無官稽考之法不立私販充斥捕禁之令不行雖有運司不相統攝以致官鹽停閣商人坐困合行委三府并福寧州各清軍官

負兼理鹽法各戶房該吏定立鹽科俱報立牙  
行水客前來收買官鹽於各市鎮發賣按月比  
較牙行查追退引按季類繳遇各委官給由考

滿查繳退引有無完足其有未繳退引者卽係  
任內不了事件不准起送等因今照前項尤溪  
永安大田沙建甌壽寧政和松溪等縣俱以因  
山通道私販透越西路官鹽勢必被梗相應申  
明舊例嚴加禁約行令三府并屬縣各清軍官  
一體着實舉行仍申飭各處巡捕巡司嚴加緝

獲仍乞此後幫鹽賣畢分司追報幫冊揭查各縣中間若無水客報買容令本司將該縣清軍官叅究該吏牙行徑自提問庶互相警飭官鹽可通私販少息矣隨該本司查得黃崎鎮係福寧松溪政和通鹽門戶已前議定鹽幫責成督賣外其餘各縣合照司府會議施行

一查溪船以防夾帶照得商人中鹽發賣鹽船俱委船戶行使自身另駕一船往來宿食俱於其中多有一等豪商駕牛船坐河船私帶鹽斤不

在縛船之內及至竹崎盤驗之所則因其爲商人之鹽縱容私放及至當幫之日通同牙行潛行搭賣積弊相沿非止一日合無痛加懲革明給大示止許商人帶小河船一隻亦必細加查驗其餘牛座船隻盡行革除不許行使如違從重究問則商人夾帶之弊可得而除矣又芋原洪塘一帶埠頭地方有等積棍姦徒專一駕使蓬船預先買鹽密藏船內探聽各處鄉官使客到彼隨謀驛遞夫保撥附行卒跟隨在後以致



竹崎所不敢盤驗肆然通行又或買囑衙門牌  
差人後使高坐船頭詐稱官差之船不服盤驗  
似此積弊亦當痛革合無令芋原驛弁遞運所  
官吏今後但有搭積弁公差船隻俱要嚴行看  
視果無夾帶私鹽方許運送如有不行用心驗  
過縱容船戶冒帶私鹽者到關盤出就將船戶  
拏解問罪鹽貨入官官吏夫保一併提究則奸  
豪知警而指公射私之弊亦可以去其什九矣  
前件行據該府會同運司覆議相同其牛座河

船除禁革外如有投托勢要坐駕過所不服盤  
禁者並聽籍記船戶姓名或叅申拏究或俟船  
回之日追治庶使法紀可申伏候詳奪

運使何思贊議

一明委任以清鹽法照得本司行鹽地方最狹惟  
本省八府一州載在 會典其產鹽所在原有  
七場係福興泉漳四府地方濱海之民家可晒  
鹽自食或市諸附近竈戶故官鹽難行先年奏  
免潯美浯州兩州惠安四場晒鹽折納銀米於

是興泉漳三府官鹽不行矣福州府屬與福寧州向因濱海亦不行官鹽續開設南港黃崎鎮惟省城附近與福安寧德稍通官鹽耳汀州府附近廣東因南贛軍門題議得通廣鹽而本處之鹽遂亦不行故本司產鹽不過上里海口牛田三場行鹽不過延建邵三府而已課額之少有由然也先年開設分司於水口實爲三府總會之地本司鹽課全係於此嘉靖十四年議定一式溪船裝子母鹽五百零一引前往水口挨

幫發賣延建邵三府屬民食鹽聽各縣民願充  
水客僱造一蓬至四蓬船報分司收買官鹽折  
引照賣此爲良規無容更議查得先蒙巡按御  
史包題准申明先年事例行鹽地方司府  
州縣衛所軍民買食官鹽俱照里甲坐派發買  
按月追繳退引類解合着令延建邵三府并福  
寧州定委清軍官兼理鹽法仍於各行鹽府州  
縣戶房該吏定立鹽科各報立鹽牙水客前來  
水口具單投報分司承買官鹽折給引目水程

照往各縣清軍官處投引驗明與其發賣民食  
畢日引投本官繳府類繳本司解繳戶部彼此  
稽查其法已密但近因地方多警私販之徒乘  
機充斥水客被阻前項清軍官負因循怠玩其  
該縣有無發賣官鹽有無退引銷繳全不加意  
惟邵武一府查繳退引而已合無自今爲始行  
令各府州縣清軍官管理鹽法如係裁減縣分  
正官兼管毋得推諉誤事仍要於戶房該吏定  
立鹽科一人承行專理報立牙行水客承買引

鹽按月比較牙行查追退引每歲首先將官吏  
職名開申本院查考并呈本司知會年終稽查  
覈其功罪有不足者行提商牙問以影射重賣  
罪名官吏聽本司叅詳本院查究輕則提問重  
則黜革年一行之不爲姑息則各州縣俱各盡  
心不分彼此庶事無推托而可責成矣

一禁食私鹽以通官鹽查得舊規福建八府俱應  
行食官鹽今查興泉漳三府先年久不行鹽無  
容遽議福州府所屬如福清羅源縣係濱海產

鹽之地各家自能煎鹽難令盡食官鹽與閩候  
懷三縣近行南港官鹽亦無容議外查得永福  
閩清古田連江四縣原係行鹽之地而今並無  
商人行鹽到彼及查延建邵所屬尤溪永安沙  
縣大田松溪政和壽寧建寧各縣遞年亦無商  
人行鹽以致各縣並無銷引豈各縣俱能淡食  
哉其水口販買水客應往各縣發賣而不行往  
賣者其故可知也蓋以各縣俱有小路可通私  
鹽其間地虎窩頓不容水客往彼發賣查得永

福閩清皆福清興化私鹽從清源里可通永福  
而達閩清古田縣係福清私鹽由羅源縣起步  
舖寧德縣石壁嶺三望嶺可通尤溪永安沙縣  
大田將樂順昌建寧皆興泉私鹽由永春德化  
縣地方可通松溪政和壽寧各縣皆福清私鹽  
由寧德縣水滌福安縣穆洋斜灘可通連江長  
樂縣附近海旁向食私鹽其間私販神出鬼沒  
勢難盡禁惟責令各縣招報水客令其行鹽或  
有地虎聽其改過報名在官充商行令自往水



口黃崎鎮南港告買官鹽折引回縣照賣每年

照數銷引則前弊可除矣合無今後行令前項  
州縣遵照先年題 准俱照里甲行鹽事例備

查該縣地方廣狹量該食鹽多少及有無通隣  
界發賣共該引若干開報本院行司立案仍每  
年定立牙行商總在官責令承認照數銷引招  
報水客不拘名數給帖付照聽其前來該鎮投  
報買鹽折領引目并給限票定往各該縣分發  
賣凡遇水客有鹽到彼發賣該縣官卽查明有

無引目係何姓名從何處買鹽若干何日水程  
限期登記官簿本官仍量限日期責令牙店轉  
買完日追引類繳不許影射接買接賣如鹽多  
者追價入官姑不加罪以示招徠如有票無引  
者卽係官吏私獎并引票過限者卽係水客中  
途影射俱不准照其鹽入官引票追繳鹽價類  
解每季將商引姓名數目開報本司查對各鎮  
原賣姓名數目有無相同年終悉聽本司查究  
如果折引不足原報之數卽係私鹽盛行查提

商牙治罪呈詳每引扣追正餘價入官以充

國課則各縣無不通鹽之弊行之數年課額必  
增矣及照漳州柳營江曾經戶部郎中錢 查  
明議要行鹽已蒙奏 准下戶部覆議通行布  
政司轉行漳州府查勘乞案行查俾漳泉興三  
府以漸而食官鹽亦不加賦而可足國充餉之  
一端也

一嚴盤詰以防透越切照私鹽能禁則官鹽自通  
本司行鹽西南二路鹽船必由閩安鎮而入東

路必由古鎮門而入各因附海曠邈防禦頗艱  
若竹崎所乃西路之所必由故先年於閩安竹  
崎各設有巡檢司與批驗所在焉又各設有把  
港官以爲巡緝至水口又設有分司住劄所以  
爲西路之防者密矣惟東路則續後開設防閑  
少疎亦其地附海勢使然也訪得閩安鎮外海  
洋曠蕩福清縣并興泉漳三府地方臨海居民  
俱以煮海爲鹽人人得以私販或用大船或使  
小艇滿載駕泊鎮外交通本鎮或南臺洪塘竹

崎等處販徒爲之棚主負夜透越過鎮至柘樵  
候官等處灣泊招引竹崎并邵武古田茅寮街  
等處販徒接買深阻西路官課已經申明嚴行  
該鎮所把港官并巡司用心設法督率兵哨人  
等務要捕獲如有怠玩一體查究外查得泉州  
府私鹽路由永春縣通入永安沙縣而出沙溪  
口賣與順昌縣并邵武府建寧各縣販客興化  
私鹽路由仙遊縣通入尤溪縣而出尤溪港口  
賣與延建邵三府販客其沙溪口之鹽出經順

昌縣河下尤溪港口之鹽出經延平城河下俱有浮橋可防透越又查滄峽原設有巡司延建等府縣水客報買水口官鹽船皆由彼經過實俱要害處所合無嚴行延平府河下着令該府清軍官順昌縣河下着令該縣清軍官用心查驗以時開閉滄峽巡司原該盤詰加謹巡緝但遇鹽船到彼查照引目相同登記姓名引數卽許放行如無引目及引票互異者卽係私鹽拏問滄峽巡司仍將每月驗放過船鹽隻數開報

本司查考該府縣亦須按月類報本司以憑查對幫冊同異覈銷引目庶稽詰嚴明而私販之徒無容售其奸矣

一減子鹽以銷正引查得各場竈戶該煎鹽引納官原有定數此外聽從自賣民食亦寬竈之意先年商人開中鹽斤先納引價在司領引下場支鹽每正鹽一引帶餘鹽不等後該本司婁運使察知此弊議定一式溪船每正鹽一引許帶餘鹽二引是謂一母二子呈蒙巡按福建監察

御史白 題 准如議卽今遵行但查各竈戶

旣辦官鹽之外亦無餘鹽加倍蓋因涪州惠安等場之鹽旣准折銀米遂將前鹽越境發賣各商湊數而官鹽舊額一年所賣該鹽一萬三千餘引遂致阻滯難賣不足原數相應議處查得兩浙運司商鹽俱係一母一子官商兩便合無今後正引只許一母一子相兼發賣旣不病商亦不病竈庶幾官鹽易賣引目易銷以後每年定限完銷原額正引一萬三千之數則官鹽無



久積而引目無久滯矣亦因時而變通之一端也隨蒙巡按監察御史陳 批近訪得商鹽積滯八九月分幫船尚未盡掣皆由於私販盛行也 國課軍餉所係甚大本院切有憂焉據呈明悉俱如議行各處報引銷引府以同知縣以掌印官管理其未通商鹽縣分俱議立商牙姓名開報聽其折引管鹽官每季將鹽引數目造繳延平府及順昌縣浮橋俱聽管鹽官查驗隄峽巡司仍照舊盤詰子鹽准照一子一母之法

以銷引目各官承委務檢身率下其有乘機貪肆怠玩者本院訪出定行叅究販徒嚴加緝捕中有未備者布政司再查議通詳併定委官職名行司府着實舉行豎立碑石刊鐫告示曉諭此繳

運同林大有議

一飭官箴之戒蓋風紀不廢法度乃行今水口分司無論專官署官遇船開幫每船一隻常例銀十五兩每月開幫一次該船十隻共輸納常例

銀一百五十兩又茶菓銀每月五兩掣船鹽二三百隻受饋銀八九百兩傳襲爲常爭求差委况又日用飲食俱取備於牙行非但酒席賀儀是徒吝小費而欲藉民以充口各司委人署理尤爲無厭貨賄公行恬不知耻最當惡者一也一禁各屬常例之弊訪得閩安鎮及竹崎所把港批驗等官得受常例私弊船隻不行看驗以致私鹽充塞上里海口牛田等場俱係出鹽之地私弊尤大縱容興販阻壞鹽法所當戒者二也

一查潛徒影射之弊水口茅蔡街等處有邵武等處人氏居住結黨與販透港或從關下挑山到關插賣及革退哨夫衙門慣熟亦與裝鹽船戶弟侄交通販賣其芋原洪塘等處積棍駕使大船探有福興泉漳鄉宦起程卽收買私鹽密謀手下家屬詐作行李船隻跟隨在後混插駕行直過關所販賣不經盤驗俱阻壞鹽法所當戒者三也

一商稍私賣私夾之弊掣鹽之法期定丈尺十三

艙平滿爲度近來竹崎所上引鹽商稍陸續盜賣十船九空及至當幫或通閩安鎮私鹽抵補或買南港官鹽填塞其竹崎所下引鹽未經掣驗者亦將鹽盜賣過半觀望委掣臨期買補其裝鹽溪船係原改一式原議每船除首尾空艙安頓楨棋衣糧并中二艙看水俱不裝鹽外止許彙實一十三艙扣該五百八十一引零二十斤置立鐵線橫圍三條直量一條驗量合式方准放過近來商稍作弊仍將首尾空艙裝載不

畫又將傍板加高慮泊沉水巧將杉木櫬墊使  
船浮起計一船可裝二船之鹽及至過所赴關  
臨期用小船一隻起剥以足用爲期今却用五  
七隻混帶插賣期未至則先賣而復補期既至  
則多方而夾帶所當戒者四也

一嚴發賣違期限如蓬引之弊當幫船隻先一日  
報引當次日牙行同水客赴司領水程票親詣  
河下印船往時有經時月而不報引者有報引  
而不吊完者其曹船照蓬加減如單蓬曹溪船

一 隻裝鹽六引每引二百斤六引該一千二百斤外火食耗鹽共該一千六百斤却有加至一二百斤加至四五百斤及八九百斤者違期則壓幫次加斤則行私鹽所當戒者五也

一 治剩引賣引接買接賣之弊各商原領引目俱有定數以引配鹽豈有餘剩之引照鹽發引豈有不足之鹽皆係商人通同船戶先期盜賣以致引數有餘吏書又將餘引隱賣其水口賣空溪船卽放退關下直抵南臺黃田岑河下灣泊

仍聽商人僱裝引鹽近來停泊水口大雄地方  
將小木溪剝船私鹽密盤在內接買接賣隱收  
餘引則影射重照接裝空船則延綿不絕所當  
戒者六也

一禁河船查竈船以防奸弊商人俱寓居省城內  
外鹽船當幫乘坐河船前去水口却聽船戶收  
買私鹽夾帶插幫發賣竈船煎銷滷水往往乘  
機插賣私鹽及私煎而不給票給票而不銷繳  
俱爲阻壞鹽法所當戒者七也



一禁兵哨混拏之弊竹崎所下南臺販鹽之地竹崎所上水口盤掣地方上下相連公私雜混今行南港把港官查照舊規立簿附寫吊賣水客小販姓名給與小販小票如有拏作私鹽小票爲據獲而有票無票而不獲兵哨各治以罪其在竹崎所上者雖係南港官鹽亦以私論所當戒者八也蒙巡按福建監察御史曾 弁蒙巡按福建監察御史沈 批呈革前弊仰司嚴行禁革及行各關所衙門首刊鐫大木板榜遵守

施行

運同伍典議

一立石垂久以肅官箴隆慶二年十一月內准總  
司關蒙福建布政使司劄付蒙巡按福建監察  
御史王 案驗訪得運鹽水口分司掣放鹽船  
每船一隻官取銀四十兩以爲常例前此分司  
掌印官皆所不免而管求署印者又加多焉以  
故聽憑商人夾帶私鹽漫無稽考立石該司禁  
革備劄行司移關分司該本司同知伍典蒞任

之初訪知前弊出示禁約以後各宜砥礪名節  
恪守官箴如商稍敢有仍前餽送者以打點衙  
門論斂者以指稱誑騙論跟隨人役乘機誑索  
希圖通同作弊者本司不時密訪得出或被入  
告發定照律例重究仰立石本司永遠遵守施  
行

一正鹽法復舊規以絕弊源隆慶二年十二月內  
蒙福州兵備道副使柴 案驗蒙巡按福建監  
察御史王 批該本道呈詳議造西路樣船二

十隻等緣由蒙批依議行伍運同督造如式刻  
期完報本院另委官查驗齊一無弊方許給照  
付商稍裝運以絕弊源如有借此支吾仍舊遷  
延推托不卽興造者該道卽行查究解院重治  
繳陳邵三等另結蒙批到道案行本司備關到  
臧准此依蒙遵照給示曉諭各商卽便速備木  
植釘灰等料召集匠作務推老誠歷練商人二  
十名監督刻期興工照依原議船身直長及近  
加引橫濶丈尺分寸如式打造一式樣船二十

隻完成以憑呈報察院委官驗量刊刻字號給商稍裝運如有奸頑賄囑匠作巧造縮腰漲鰭鑿眼加高更易尺寸等弊定行折毀另造匠作重究其臣字幫起幫鹽俱候樣船造完方許裝運敢有借此支吾遷延推托不卽興工打造希圖舊號船隻裝載爲弊者定行呈解究治等因示諭外隨該商人陳曉等開報商人洪子明葉有義等二十名公同督工脩造船隻各商姓名到職合候詳示行司以便遵照舉行緣蒙打造

樣船以絕弊源事理未敢擅便除通詳察院并  
分巡道照詳外備由開坐移關總司知照施行  
一遵新式以定規制照得溪船規制先該運使婁  
議造每船自頭至尾直長八丈內第五艙起至  
第十九艙止共一十三艙長五丈五尺六寸圍  
量第五艙橫二丈五尺九寸第十二艙橫三丈  
六寸第十九艙橫三丈一尺一寸至嘉靖四十  
三年運使何思贇查得三十八年倭寇將前船  
燒燬奸稍補造過大議呈巡按陳 批允每船

加正餘火食耗鹽共七百八十九引二十斤限  
 裝一十三艙平滿仍兩艙遮浪高一尺不許裝  
 鹽圍量第五艙准加二尺三寸通舊筭該二丈  
 八尺二寸第十二艙准加三尺四寸通舊筭該  
 三丈四尺第十九艙准加三尺二寸通舊筭該  
 三丈四尺三寸近該商人陳曉等僉呈巡按王  
 批行議詳打造一式樣船二十隻除頭尾直長  
 八丈與第五艙起至第十九艙止直長五丈五  
 尺六寸照依舊式外其第五艙第十二艙第十

九艙合照新加圍量尺寸如式打造不許異同  
工完呈詳本院委官查驗施行

一較量度以復舊式查得總司置造鐵縲自運使  
何思贊議加尺寸第五艙橫長二丈八尺二寸  
第十二艙橫長三丈四尺第十九艙橫長三丈  
四尺三寸第五艙起至十九艙止直長五丈五  
尺六寸共鐵縲四條既經新造樣船合無將分  
司鐵縲與總司鐵縲并庫內銅尺彼此較定如  
有多餘照數截去兩頭直量之處止用小環交



永... 卷... 三...  
匪不許仍前虛加庶造船長短之則與圍量多寡之數各有依據矣

一嚴法禁以杜夾帶照得西路鹽斤必由竹崎所駕至水口往年過所多係本司堂官親臨圍量比因去省頗遠當幫船隻一時駕運不齊委官查驗承襲已久以致私鹽數多官課日減合于當幫之期責令各船一齊到所仍堂上官一負或本堂官少就近府佐一負臨船圍量庶幾弊革而鹽法清矣

一查關防以除夙弊查得當幫溪船駕至竹崎所  
委官驗過將母船引鹽船入子船每母船一隻  
用子船三隻蓋以子船便于剝淺故也若子船  
別造各得三分之一駕至水口方入母船則夾  
帶之弊永永可絕但船數已多勢難再造使不  
嚴立法程則過所之後母子通同難免沿途盜  
賣之弊今查竹崎所蓋印母船四顆子船二顆  
間有商稍將兩旁無印之處堆高近尺中間用  
印之所反低數寸且船艙本濶用印太密左右

兩傍任伊盜賣殊非法紀今後過所將子船運到引鹽盡盤母船圍量明白方許子船剥運所官親將母船每艙蓋印六顆子船每艙蓋印三顆鹽要平整印要稀疎以前傍高中低艙濶印密之弊通行禁革如子船夾帶盡沒入官仍將商稍究問如律所官蓋印過數目仍結報某日在某船上用過關防幾顆係某親用中間並無前弊到司驗出卽行根究庶關防益嚴弊端永絕矣

一申舊例以通官鹽照得西路官鹽惟賴延建邵  
三府各屬縣而已節蒙察院詳議着各府縣專  
設官吏管理鹽法繳引比較務期官課疏通向  
各遵行柰法久人玩奉行欠嚴遂致販徒盛行  
國課日減相應申明嚴禁合候詳示備行延建  
邵三府并各屬縣查照舊例着各清軍官并戶  
房吏一名專管鹽法嚴着各該巡捕巡司負役  
限獲私鹽并繳過退引按季造冊責差該吏齋  
赴本司轉送察院比較查其繳引多者卽係私

鹽盡絕如無水客退引卽係私鹽盛行乾將縣  
官參究該吏牙行提問仍將沙縣私牙棚主接  
買鹽販及東路官鹽越過水北東由街巡司俱  
行令沙縣建安甌窰各縣嚴加禁緝庶販徒屏  
跡而官課疏通矣

蒙巡按御史王

批據議俱有裨鹽政該司着實舉行其首議造  
船規制應否仍照新式該道查議停妥具由速  
奪興工在邇不可久延也此繳蒙本道批據議  
精詳仰候院示遵行繳又蒙本道案驗蒙本院

批該覆議造船規制緣由蒙批既覆查無異行  
該司督造如式速完報繳備案行司遵照舉行  
一繳報正鹽法復舊規以絕弊源准本司同知伍  
典關准總司關奉分巡兵備道副使柴 案驗

該奉巡按御史王 批該本道呈詳議造西路  
樣船二十隻委職督造等緣由奉批依議行伍  
運同督造如式刻期完報本院另委官查驗齊  
一無弊方許給照付商稍裝運以絕弊源如有  
借此支吾仍舊遷延推托不卽興造者該道卽

行查究解院重治繳等因備案行司備關本職  
依奉議將遵新式以定規制棟督工以便責成  
立匠頭以防奸欺較量度以復舊式嚴法禁以  
杜夾帶查關防以除夙弊申舊例以通官鹽七  
事呈詳本院奉批據議後六事俱有裨鹽政分  
巡福寧道行該司着實舉行其首議造船規制  
應否仍照新式該道查議停妥具由速奪此繳  
續 奉本道案驗奉本院批該本道覆議新式  
規制與原呈議相同緣由奉批既覆查無異行

該司督造如式速完報繳備行到職遵將樣船  
二十隻查照嚴督商人洪子明等自備工料如  
式完造備呈本道議委福州府李推官查驗轉  
詳本院奉批依擬行委李推官親到各船照式  
查驗有無別弊具由報繳該本官親詣黃田岑  
造船地方喚集商人洪子明等驗量得樣船二  
十隻俱照原議丈尺查對卷簿相同仍牽挽舊  
船一隻遍尋縮腰漲楮鑿眼斜艙釘環加高等  
處與今樣船彼此相形委是弊孔盡塞規制齊



一備呈本道轉巡按御史蒙 奉批樣船既查  
驗無弊准給照裝運仍行該司查照原議次第  
舉行用心稽察蓋恐有法外之遺奸也此繳依  
奉備案行司遵照外本職隨將樣船二十隻編  
立循環字號每號十隻刊刻察字號西路官鹽  
弁於裝鹽艙口限板俱已印烙明白及于圖量  
處所刻火烙花押于上又刻船由送赴本院掛  
號印發回司給商僉保誠實船戶隨幫雇募裝  
運已將循字號船十隻給伏字幫商人林汶等

裝鹽至竹崎所該本司查得幫鹽到所原係堂  
上官親臨查驗今樣船更新創議免其割沒又  
立法革弊之初必須會同委官方見嚴肅呈詳  
本院奉批新造樣船正除夙弊該司呈請委官  
蓋重其事也仰福州府李推官會同盤掣如有  
奸弊即便擒拏解院以憑重治掣完仍具由繳  
隨該本官會同本職親詣竹崎所查驗各船合  
式並無夾帶免其割沒仍取商梢結狀具由呈  
報外近戎字幫鹽用環字號船十隻到所又准

總司關奉分巡道批允行本職查照驗掣各船無弊卽與拽扯過所并將子船嚴查卽蓋關防以防沿途接買備由詳報及將舊號裝鹽違式溪船盡行鋸拆除革不用外先該本職議詳水口公費銀兩每月總司動支曠役牙行經紀銀二十九兩關送分司給發牙行湊同原扣稅銀一十五兩支應上月用有羨餘卽作下月支用截數開填文簿按月關送總司按季類報分巡道稽查及將支銷數目見行造冊連卷簿聽候

查盤爲照本職原奉委督造樣船二十隻完成  
委官查驗明白見行轉輸裝運幫鹽悉照詳議  
各項事理逐一舉行俱有成規外擬合呈報備  
關煩爲轉呈等因准此理合備由具呈照驗施  
行

吳光祚

一西路樣船造完陳末議以脩鹽政准同知伍典  
關照得閩中鹽課惟西路稱鉅往年鹽船違式  
夾帶數多以致幫數減少課餉不足近奉本院  
委職督造樣船又經委官查驗無弊給與西路

商梢挨幫領駕此西路世世之利也然船造雖完不隨事而經理之雖蘭舟翠檣無裨實用茲擇其經久可行者條爲四事具由通詳伏乞采擇施行西路幸甚

一曰速幫運先年每船載正引鹽一百六十七引子引鹽三百三十四引火食耗鹽八十引二十斤連子引火耗共五百八十一引二十斤每年掣鹽常在六幫上下後改爲一母一子之法加正引三百引連子引火耗至七百八十九引二

十斤引數加增夾帶又多雖每年四幫可消歲額一萬二千引然本司報中引目尚係四十二年之數今樣船造完每幫革去私鹽三分之一則今之十船僅往之七船耳若不速催幫運則上府食鹽不足商民坐索高價殊非法紀合行嚴限之法責令商梢循字號樣船過所則環字出倉循字至水口則環字過所循環無端首尾相應一年可至六幫銷引一萬八千之數但近來商本消耗先年入倉之鹽數多不足貧商每

于臨幫方行借貸買補以足七百八十九引之  
數若不先行督催至于臨幫缺鹽然後補足雖  
欲速而不達矣今幫數已在戎字幫合無查將  
見追盜賣鹽斤遵奉按院王 詳允買補事理  
羗字以後體字以前應該買補者嚴催補足務  
不失六幫之數庶免臨期失悞而幫期自速矣  
伏候裁奪

二曰專責成照得西路行鹽之地止延建邵三府  
近因東路鹽斤透出建安甌寧浦城等處而興

泉二府私鹽則又越過尤溪永安沙縣阻絕西路官鹽各縣水客多不樂赴水口近奉本院案驗仍照先年議於延建邵三府并各屬縣各該清軍并戶房吏一名專管鹽法布政司仍查照舊例行令着落各該巡捕巡司員役限獲私鹽并繳查退引按季造冊責差該吏赴運鹽司轉送本院比較如水客來少卽係彼處私鹽盛行分司先將各縣兼管鹽法官指名關總司知會候該縣送司查比叅呈本院究治仍先行文知



會使知嚴行查催庶事有專責而官鹽易通矣  
伏候裁奪

三曰嚴稽查先年船過竹崎所多係委官不行查  
驗夾帶之弊誠爲非法自奉本院詳允始係本  
司官親查近又奉分巡道批委本職以後不必  
呈詳夙弊禁革今樣船初成乞着爲例將母子  
船隻灣泊一處先查子船卽查母船母子相離  
展轉作弊至水口關下亦仍照前例一體嚴查  
以清弊源再照商人臨關另催河船一隻以便

止宿訪得往年船戶遇商寫載先裝私鹽在船  
乘機過關貨賣商人利其省值互相容隱亦有  
慣熟奸商通同私買深爲阻壞鹽法今諸弊盡  
絕惟此尚爲法外遺奸相應通行嚴禁以後但  
遇商坐河船務要一體嚴查痛革夙弊仍前不  
悛者拏解本院重究如梢手夾帶商人先坐不  
知者許首免罪庶譏察嚴密而奸弊盡絕矣伏  
候裁奪

四曰定法守照得商梢之弊一在夾帶一在盜賣

當幫之船欲行盜賣未有不先夾帶者今船有定式板有定限查圍量額定之處則有花押火烙較周圍鐵縲之度裁其贏餘寸數先已委官丈量稽查無弊今又嚴于驗掣子母兼查雖欲夾帶亦將無處可安矣但商稍以射利爲心法外遺奸恐尚不免容職查照先今呈請事理但遇樣船載鹽到關嚴行圍掣如堆高過板係夾帶者積分積寸盡數割沒一人有犯十人連坐如果遵式鹽在板下不至盜賣卽係委無他弊

免其問罪如有通同作弊者查訪究治則公平正大之體既不廢法而紀綱法度之施亦不病商矣伏候裁奪

巡按福建監察御史蒙 批分巡福寧道查議  
通行繳續奉案驗本道議得立法通商固鹽政之急務而隨事經理亦職分所宜然查據本官所議列之雖爲條陳四事實貫之不過利弊兩端今除速幫運嚴稽查二事責在該司議亦周盡候詳允併行外至於私鹽盛行則官鹽阻滯此

必然之理東路鹽斤透出建安等縣而興泉二府私鹽越過尤溪等縣皆所以撓塞西路商鹽也近奉本院條約行布政司轉行延建邵三府及屬縣各清軍官并戶房吏一名專管限赴運司轉送比較可謂洞徹病源大疏利路矣然縣有大小水客雖報名在縣該司必有撥定船數議定引目如止責其捕緝私鹽而不查其水客到否似猶未探其本也合宜查定額數預行之府府行之縣各令依期照數督發牙客運船赴

關領買如船數不足卽知其私鹽尚行雖有緝獲仍從重將牙客及巡捕巡司員役各治以罪船數若足雖當季當月一無捕獲亦免究責其鹽政相關府縣佐貳如有怠玩故縱情弊亦聽該司指實叅呈庶事有責成法無廢斃至於議法在上本期必行奉法在商須使之信樣船之設正因船無定式夾帶者多圍量之餘輒行割沒往者官不盡法商利如貲實所謂因循之政也乃今呈議樣船允行定造俱完詳委運府官

員嚴覈無弊然後發商裝載本以杜絕夾帶之  
源也近因委官吊掣泥於前此賊鹽盈千今則  
一無割沒懼生物議不免過求則是授之以一  
定之法而又坐之以法外之罪也夫官不信心  
商不信法則又安用紛紛者爲哉合無今後圍  
掣式船俱以限板爲則堆高者爲夾帶窪下者  
爲盜賣此外毋得過行搜指以重困商人如各  
商船果有慢令愆期已過竹崎未到水口百四  
十里之間乘空轉販事發有顯跡者必嚴以例

罰革除名籍廢法周而嚴人遵而信矣俱候呈  
詳允日備行該司通行遵照惟復別有定奪等  
因奉本院批水客與私鹽互爲消長所當併查  
至於商無法外之奸官弛法外之罰又所以惠  
商而信法者也俱依議行運鹽司着實舉行此  
繳依蒙備案行司卽行該分司將原議速幫運  
嚴稽查二事併本道今覆議詳允各緣由通行  
各行鹽地方并鹽政相關各府縣衙門及佐貳  
等官一體着實舉行又蒙福建布政使司批據



條議皆實政鑿鑿可行釐弊恤商俱在其中矣  
仰照按院批詳行由繳分守道左叅政熊 批  
據呈四議上可足課下不病商誠于鹽法有裨  
經久可行仰候察院詳示行繳

一議賣倉場沒官囚徒鹽斤隆慶五年三月內蒙  
巡按福建監察御史蔣 批據本司經歷司呈  
詳商人高明葉有義等僉告益竈通課事告賣  
上里等三場南臺等四倉沒官囚徒鹽斤緣由  
隨該本司署印同知伍典議查得西路水口正

幫船鹽每船裝母子鹽各三百引商人每母引  
先納引價三錢在官然後領引下場支鹽上倉  
俟至當幫駕至水口發賣母子引納餘價四錢  
今三場四倉沒官鹽斤原議每引定價三場七  
錢南臺閩安竹崎三倉各九錢水口倉一兩一  
錢先年各商赴院告賣前鹽本司止照批詞先  
後呈詳批允刊刷官票掛號給商領賣近該本  
司運使李大吉查議得官鹽正法止應有名客  
商納價中引及依例帶中餘鹽輸課銷繳爲是

其他沒官厥底囚徒失水老引等項原議止許  
有幫商人告領正欲杜絕射利奸徒乘機冒領  
立法本爲詳密顧今猶有夤緣假借紛紜價擾  
如洪子謙等商者蓋因在司商名頗衆中間待  
次尚有遠在七八年近亦不下五六年者今槩  
稱有幫得領則一蒙允告即可越次速售利源  
所在人心共趨卽有重法將焉懲之今欲法守  
畫一永杜倖門莫若定議前項鹽斤必須當幫  
商人承領亦不許赴院擾贖比如甲幫見在水

口吊賣將完卽許一幫十商先期自查各該倉  
場果有收貯前鹽足今議一船七百八十九引  
之數准其赴司告明本司卽與查果是實轉詳  
掛號給票勒限責與正幫十船一併吊賣應納  
課價應繳號票卽與正幫紅牌一齊銷納若其  
所告鹽斤如或不足前數不准查給姑待後幫  
如有多餘不得帶告留候下幫查給其該領幫  
商俱要十名共利亦不許占數偏勝及圖利轉  
搭無幫併待幫未及商名在內以滋比例違者

卽以結夥興販私鹽治罪等緣由呈詳前院蒙批允遵守無容別議今各商見得幫期遠近不同遇蒙本院下車之初赴院告擾希圖爭先得利本當解究但商人嗜利無厭且見前此未定以某幫爲率故爾紛紛告擾合無姑免問罪再行申明立爲定規今後如遇海倉四倉沒官鹽斤照依原議仍令當幫十商領賣就自今率字幫爲始遇有鹽斤足樣船七百八十九引之數聽本司呈詳給與本幫十商領賣如本幫內不

足聽候查足補給率幫賣過又輪賓字幫十商  
俱要照幫公衆分利不得一人鑽刺營求仍聽  
本司挨次呈給不許紛紛告擾其不係西路幫  
商與不係有幫商人妄行告擾違例作弊者查  
照前詳以結夥興販治罪前項倉場鹽斤本司  
一面查足另行呈請本院批允刑刷官票呈送  
印掛發司給商照支領賣完日遵照原定價值  
解司貯庫前項告詞先行銷繳以杜各商告擾  
之端備由呈詳本院批當幫商人領賣四倉沒

官鹽斤既經該司議詳俱有定規豈容奸商射利撓越告擾洪子謙等姑免問罪如再犯不貸該司仍給示此繳

一商人告豁查盤隆慶四年六月初四日蒙福建布政使司分守福寧帶管福州兵備分巡福寧道左叅政熊憲牌蒙巡按福建監察御史蒙批據商人洪福等連僉呈稱鹽法舊制船由閩安竹崎水口三次掣驗方許賣價輸官續罹水火倭盜課喪商敗議照准鹽上堆事例令各商

自蓋厥屋暫寄南臺候幫向無查盤先蒙前院  
李爺行委馮推官細詢商鹽只是避災寄頓比  
之在官倉庫不同呈報詳允免盤在卷前年被  
讐稅害赴前院王爺告批兵備道委官查盤槩  
坐盜賣一萬七千兩罄業輸納柰今又值歲盤  
之期福等惶惶如戮備錄原奉院批商鹽與官  
物有間以後免盤招案哀告分巡道行司查議  
回呈未奉夫臺不敢擅豁告乞批行恩憐免盤  
等情蒙批分巡福寧道查報依蒙備牌行司查



得西路鹽法向係溪船裝載灣泊竹崎候幫爲  
因候幫年久商梢盜賣致悞幫期嘉靖三十四  
年該本司龍運副呈蒙巡按福建監察御史胡  
委官查盤鹽斤欠少將商梢治罪以後幫期不  
缺仍無查盤後因倭寇突入洪塘竹崎將候幫  
鹽船焚溺商梢喪本無柰於嘉靖三十八年各  
商告願自備資本於南臺蓋倉貯鹽以備水火  
盜三患嘉靖三十九年蒙巡按福建監察御史  
李行委福州府馮推官查盤要將各商厥鹽

倒厥秤盤據衆商告稱舊時鹽貯溪船每被船梢盜賣近又被倭焚溺告備已財蓋厥收貯以防水火盜賊今若倒厥秤盤不無消耗隨該本官看得所告情似頗通姑不倒厥秤盤止將罪名併入陳祥等招內呈蒙批允嗣後委官俱免查盤隆慶二年七月內續被黃宗福訐首倉弊蒙福州兵備分巡福寧道福建按察司副使柴備蒙巡按福建監察御史王 案驗行委延平府朱推官會同本司將各商厥鹽查盤得鹽斤

欠少不等隨將商人倪統等俱問追私賣鹽價銀一萬七千四百七十九兩零入官招呈本道轉詳本院蒙批叅詳倪統等盜賣倉鹽甚多情弊重大本當盡法追究據議憫其在傷殘之後將原贓委曲減免亦太恕矣姑依擬行運鹽司作速追併贖完納不許聽其拖延如三月內不完該道摘取贓數最多者引例另招解院以憑重處方今鹽政廢弛已極正當寧加意清理之時毋徒視爲故事致奸弊日滋也取實收

繳餘如照行依蒙備案行司追併紙贖贓銀間  
蒙本道批據倪統等連僉告稱贓銀萬餘一時  
無措告乞寬限等情蒙批行司議將各商贓銀  
分限六幫漸次追納呈詳本道轉詳本院批允  
備行照限扣追完日實收呈報依蒙陸續照幫  
追完取其實收呈繳院道外隆慶四年三月內  
蒙本道批據商人洪子明等連僉告稱引鹽候  
幫貯頓南臺倉比之在官倉庫錢糧不同守候  
八年方得掣賣告乞恩豁等情蒙批仰運司查

報該本司查得查盤倉鹽屢經前案詳覆大約  
議免查者謂鹽出商本倉由商造雖經收貯不  
過備患候幫原與倉庫錢糧有間議應查者謂  
官督其入官督其出但有私擅卽係監守自盜  
當與侵欺移用同科是查非苛察而實所以懲  
奸免非姑息而亦所以恤衆一操一縱情法並  
存權衡悉自上裁可否難擅輕議但以今日事  
勢論之前案查盤初賦數踰五萬續因各商訴  
蒙憐察曲加矜豁尚亦不下一萬七千有零始

奉詳允案下一時衆商洶洶如戮又蒙俯從司  
議酌爲六幫分追之法衆情稍安然自奉文查  
追到今已將二年尙未能完况閩中鹽政利薄

商貧重經喪亂引雖商人名目本皆稱貸富家  
故或幫未逮而先納息於人或貲已空而更認  
逋於後購官射利積弊固非一朝一人冒禁營  
私窮計亦非可已不已設欲盡法深究必無一  
商可原前賦未絕後幫併加不但情有不堪抑  
恐法難槩懲且殘商財力只有此數賦經官究

法不能蠲既責併力以完賦又責依限以完課而况新逋舊債雖屬私交根極緣由卽爲商本苟無債則無商無商則無課故欲存商以通課又須理債以資商賦課債逋三者交併勢不絕商不已矣竊照立法懲奸莫重侵盜私鹽事發一體追贓然他贓雖未獲必窮而鹽犯非見獲不理推詳法意豈不以鹽犯贓私情固可惡然弊止病商阻課未至侵損於人是以厥罪雖均議法特異或在是也故前此嘗聞一查盤又嘗

量准豁免爲今之議如欲正法以示懲則照常  
查盤自有憲例本司無敢曲爲回護如蒙原情  
以軫恤則遵照本道原議但查每年限課不拖  
幫期無悞姑准免盤若拖損十分之上照前嚴  
行盤覈等緣由具呈本道蒙批仰照上年例造  
冊送查繳遵行間續又奉蒙巡按福建監察御  
史蒙批發商人洪子明等前項呈詞轉行本  
道備行本司查議前因依蒙再加詳議得倉庫  
查盤 憲典畫一侵盜官物法例難容但幫鹽



舊不入倉建厥實由避患比與係官錢糧誠爲有間及檢查盤舊卷則幫鹽有查一始於嘉靖三十四年再行於三十九年三行於隆慶二年原與倉庫常查不同至考先年行查之由則三十四年廼水口分司查得幫商無鹽接運由於盜賣所致以故呈請查究也三十九年雖奉出巡案驗有行就經馮推官議允豁免亦未以倉庫一例倒盤也隆慶三年先奉出巡案驗行間隨據商衆告批查議適有告人黃宗福呈首倉

弊因而決議查盤亦非以倉庫一例常行也再  
照查盤正法止及係官倉庫故未有應查之倉  
庫而不詳察憫其經查未久憐其追沒數多暫  
行矜豁姑俟本年六幫無悞常課不虧准與寬  
免其或仍前盜賣悞幫管私阻課卽照三十四  
年隆慶二年追沒前例盡法究遣庶商不重困  
而法不終廢矣等緣由備呈本道副使黃 照  
得幫鹽額無查盤之例委與倉庫官物有間惟  
嘉靖三十四年與隆慶二年有因而查盤事出

於創見雖追沒數多足爲一時之利而虧商資  
本殆非經久之規今據該司請議免盤其或盜  
賣誤幫卽行追究似于情法兩盡等緣由具呈  
巡按福建監察御史蒙 批據議蓋厥貯鹽爲  
避水火盜賊之計且費出於商似與倉庫錢糧  
不同如議免盤但奸商積弊頗多仍行運司嚴  
加稽察或掣驗有夾帶盜賣誤幫虧課卽照例  
盡法究遺此繳備案行司遵照施行

運同屠本峻鹽政續議

一乞頒明示嚴禁私販藉勢透越以清鹽政照得  
芋原多有販徒每遇官府鄉宦或隨帶家眷探  
知發牌到驛撥用座站等船裝載槓箱等項卽  
將私鹽夤夜先藏各船多者萬餘斤少者數千  
斤官府鄉宦俱不之覺或通同家人倚勢作威  
假以火食爲由竹崎司所官兵不敢搜獲駕至  
水口又藉鄉宦在船不聽盤驗徑越過關透至  
延建等府發賣獲利以致西路官鹽被其阻滯  
若不呈請置牌嚴禁竊恐明年春漲舟楫疏通

愈滋奸弊分司法紀是守不肯屈法伸恩過客  
體面爲重必至徵聲動色是茲掣肘有乖鹽政  
合無給示嚴着芋原驛官吏凡遇前項船隻俱  
要先搜明白不許密藏私鹽本司刊刻號票仰  
該驛卽填某日撥某座站等船係何官府鄉宦  
或裝家眷槓箱等項有無夾帶私鹽緣由飛報  
本司稽查仍着竹崎司所督哨嚴行盤驗如有  
私鹽卽獲船戶鞠究販徒解詳查提芋原驛官  
吏究罪及至水口聽本司逐一查搜有鹽卽盤

上倉官船放行民船究沒船頭船戶革退另補  
經過竹崎司所官吏併究故縱情罪各關津俱  
刻木牌曉諭如此則奉憲禁森嚴往來船隻知  
所畏懼販徒不敢藉勢橫行庶幾私鹽稍熄而  
正課可通矣具由于萬曆二十三年十二月初  
五日通詳奉軍門都御史金 批座站等船乘  
勢夾帶私鹽此通弊也據議責在芋原驛官吏  
先行檢報稽查誠爲有見俱准如議着實禁革  
繳蒙巡按御史周 批據呈責成芋原驛搜檢

竹崎所盤驗其法良是如議刊給木牌禁示繳  
又蒙帶管屯鹽道副使汪 批私鹽阻課法應  
嚴行禁捕據議足見留心准如議另給示繳蒙  
此遵刊木牌發各關津豎立曉諭并刻號票發  
仰芋原驛查驗填報去後至萬曆二十四年二  
月初六日據本驛填報飛票稱翁脩撰撥用座  
船三隻無鹽本司查得本官止到水口登陸隨  
督哨夫搜得船內私鹽四百六十七斤拘獲船  
頭陳九審稱係乘本驛驗後續往洪塘地方密

藏私鹽聽裝家眷徑越竹崎不服盤驗等情隨  
將陳九問擬徒贖革退船頭名役另僉頂補具  
招弁照議今後芊原驗過座站等船尤恐中途  
盤接先報竹崎司所查搜仍填號票遞白沙驛  
掛號凡遇船隻到驛換夫亦要細查有無私鹽  
填票飛報本司稽查如或故縱及至水口搜出  
私鹽定提各驛弁司所官吏併究招詳庶可杜  
絕座站等船夾帶盤接之弊呈詳本道批陳九  
依擬贖完發落餘如照行實收繳依蒙追完陳



九紙贖類解外仍刊木牌併發白沙一體遵行  
間續該本司查得該驛夫甲蕭東等擅自哨獲  
余五盪船一隻內裝私鹽六千斤受財賣放余  
五隱匿鹽五千餘斤止將八百八十七斤報司  
隨拘蕭東等擬徒另招呈報外又蒙本道批據  
本驛申稱無人堪用難以盤詰希圖將來設哨  
滋弊隨該本司查議今後止許白沙驛查驗座  
站等船有無私鹽填票飛報本司稽查不許徑  
搜及哨獲經過客船等緣由呈詳本道蒙批如

議嚴督白沙驛查驗座站等船有無私鹽填票  
密報不許該驛徑搜及出哨攔獲經過客船違  
者重究此繳依蒙見着白沙驛遵行

一嚴禁官鹽插沙便民通課照得前此水客拆賣  
簍鹽雇船運賣原無釘封亦無鹽樣比對致任  
奸梢中途插和沙土民食不堪此其末流之弊  
尤在水客各自關防與投賣該縣稽察禁絕本  
司不得而遙制之也合無以後幫鹽到關本司  
先請各船掣驗比對總司原送鹽樣相同果無

揀沙等弊取船內樣鹽三十斤另用蒲包網裹  
印封差人徑送延建邵三府管鹽館分包封發  
各縣收候查對本司仍將牙行開報水客拆買  
某商筭鹽雇裝船戶往賣縣分刻填號票鈐印  
并諭水客對商拆買之時驗無沙土然後吊裝  
曹船架集關下本司逐包抽驗原封及對報買  
筭數相同卽對各艙釘密俱用印信號票封固  
方放過關及令水客各自關防船梢運到該縣  
先驗本司原封號票并各筭封記有無損壞比

對鹽樣如有沙土卽係水客縱容船梢中途押和一體依律治罪候詳允日移闕總司與延建邵三府管鹽館轉行各縣遵照稽察并各給示曉諭客梢遵守庶奸弊可釐而鹽政畫一矣具由於萬曆二十三年十二月十五日通詳奉軍門都御史金批鹽樣之法一行商梢自不能挿和矧加之封號稽察浸密矣仰照行該司與延建邵各管鹽官遵行此繳又蒙巡按福建監察御史周詳批樣鹽封發如議行繳帶管屯

鹽道副使汪 批據呈幫鹽到關先取樣鹽比對曹船釘封稍杜插和沙泥弊竇如議移行各府管鹽官仍給示嚴禁繳分廵建南道副使盛批所議種種防範之法最爲精密一清宿弊有裨地方仰候兩院詳示行繳蒙此隨移文延建邵三府管鹽官轉行各縣一體遵行

一覈故實重信地嚴督捕以明守成萬曆二十三年十二月二十二日奉軍門都御史金憲票仰司官吏即查巡鹽巡河諸員役有賣放私販

竊盜弁曠役不守信地者申究重治等因奉此  
案照先爲地方事萬曆十四年二月內先該本  
司運同吳仲芳查得水口民居稠密奸僞易生  
本司徵收餘價鹽價弁院道紙贖一應錢糧關  
係匪輕雖大箬水口塔嶺谷口等處設有哨兵  
在彼防守俱以不屬本司管轄不聽督率呈蒙  
兵備道副使錢行委本司按月將各官軍員  
名文冊發仰查點如有不到及老弱員名頂替  
者呈送提究一向遵行外近因人心玩愒防守

不嚴以致竊盜生發深爲民害本司稽查點督  
捕未蒙行委又無員名文冊似難稽查况今春  
汛在邇若有疎虞責將誰諉合無呈乞查照舊  
規按月將軍兵文冊發仰本司親詣查點如有  
曠後不守信地及賣放竊盜者聽本司申詳究  
治庶人心知儆而地方無虞矣具由於二十四  
年正月初七日呈詳本道副使汪 牌行本司  
即便嚴督巡守大箬水口塔嶺谷口嶮峽等處  
信地哨官軍兵加謹巡守緝捕盜賊私鹽該司

不時親詣各該信地查點如有曠役不到及以老弱冒名頂替臨期雇人應點賣放竊盜私鹽與哨官賣放軍兵者俱據實指名呈究依蒙見今遵行

一盡艚裝鹽疏課祛弊據盡字幫商人劉以同等連僉呈稱西路幫鹽每商部引四百道計鹽二千五十包剝船運至水口分吊曹蓬百隻近時艚船儘可容鹽三十餘筭議將原裝三艚併作二艚原用部引四張加作六張每幫用艚千隻



今減止用六百七十隻其建泰等縣船隻革去  
二篷以防重底夾帶只用單篷依艚裝運仍將  
艚船丈烙嚴禁新造不許過大等情據此查得  
西路每商原給部引四百道下場支買正餘加  
課并火食耗鹽通共二十萬五千斤內有奉文  
自運建甌二縣發賣鹽一萬二百五十斤外加  
腳鹽一千七百零八斤先年臨幫散裝運賣致  
任客梢夾帶多餘莫能究詰萬曆十五年蒙前  
道金 議行包法自羔字幫起每商引鹽分貯

二千五十筭并脚鹽一十七筭運至水口吊賣  
水客并本商自運共分艚船一百隻內五十隻  
各裝鹽二十一筭五十隻各裝鹽二十筭俱每  
船給引四道填發水程票一張照徃延建邵三  
府屬縣散賣斯則鹽有定數關津便于查驗始  
釐夾帶之弊每幫十商計用水程票一千張先  
期刷送本道掛發填給中有建泰等縣水客或  
用二蓬裝鹽四十一筭是一船載有二船之鹽  
每隻給引八道止填水程票一張故有用剩逐

幫繳回外今照則字幫鹽適值歲暮春初客少  
船稀以致壅滯本司嚴行催比各商與牙行店  
戶咸稱近雖有客赴買委無船隻裝運推原其  
故皆由前此艚船裝鹽太輕可以夾帶滋弊中  
有奸梢乘機盜賣又恐商客告究輒行躲裝別  
貨阻壞鹽法莫甚於此本司目擊時艱若不亟  
議加裝終難祛弊通課據呈革去二蓬止用一  
蓬與艚船共六百七十隻俱要丈烙畫一每隻  
裝鹽三十一簍或三十簍各給引六道填發水

程票一張船隻比前咸少載鹽無可加多輿情  
稱便相應俯從合無候詳允日自畫字幫起止  
刷水程票六百七十張呈送掛發填給每商該  
用六十七張分照艚船六十七隻通計鹽包勻  
分引目但查每商自運鹽一百二簍并脚鹽十  
七簍原分艚船五隻今改四隻品搭勻裝內除  
二隻各裝正鹽二十四簍外加脚鹽五簍各給  
引五道外更二隻各裝正鹽二十七簍一加脚  
鹽四簍一加脚鹽三簍與吊賣水客六十三隻

內五隻各裝鹽三十筭五十八隻各裝鹽三十  
一筭俱給引六道以上每船各給水程票一張  
照往各縣發賣仍移文延建邵三府管鹽館轉  
行各縣遵照查驗及着建寧泰寧二縣禁革二  
蓬船隻不許裝鹽其一蓬艚船俱候商客雇到  
吊鹽之時逐一丈烙不許新造過帶庶船不缺  
用鹽無夾帶則正課得疏而幫運自速矣具由  
于萬曆二十四年二月十八日呈詳帶管屯鹽  
道副使汪 蒙批據議減艚加包以絕弊竇深

爲有見仰着實行之務臻實効仍行延建邵三  
府管鹽官遵照繳依蒙隨移文各館轉行各縣  
一體遵行

一乞究奸弊以杜禍源以一法守據西路商人鄭  
應祥洪貞度等連僉呈稱切有福寧州奸民錢  
十一雷大治謝汝茂丘芳等倚藉鄉曲浸潤官  
吏擅創坵壩變亂成法該州貪婪吏書受賄妄  
申幸蒙屯鹽道查看得福寧州民皆食官鹽無  
敢異議祇因吳綱八等私築坵壩土晒鹽斤曾

經院道擬徒懲創堙塌盡行鋤罷今奸民復襲  
故智杜塞東西二路官鹽不惟阻壞鹽政抑且  
有違 相制勢必革商課行私鹽罷運司乃已  
不知異日誰任其咎亟宜痛革等緣由轉詳軍  
門奉批福寧州商鹽係奉題 准行有年矣國  
課攸關安得一旦報罷且私鹽之端一開則奸  
弊四出後將不可收拾又未經改題誰敢擅行  
如議行掌印官將利塌等處私塌拆毀仍聽官  
商撥賣以完引課繳凜凜數言足攝奸膽該州

宜卽遵行拆毀乃復出示聽煎福安縣黨同捕  
拏商梢拷打監禁威逼竄匿切思各商挾貲領  
引爲國辦課豈期反蹈湯火幾至殺軀伏乞轉  
詳嚴提猾吏奸徒據法懲治差官押拆埕塌永  
絕禍源庶幾引課獲銷成法不遭變亂等情到  
司該本司看得產鹽有場行鹽有地今天下六  
運司行鹽地方卽隔省異轄者尚共守國初鹽  
法較若畫一未有敢更創一場阻撓鹽政者也  
况運司又特掌鹽而州縣原不得越 擅變先



年福寧州民吳綱八私設土晒當經告發蒙院  
道究治擬徒追利畧不姑貸州官亦仰體意斷  
然毀堙而後聞左奸豪知鹽政律例炳若日星  
院道紀綱嚴如鉄鉞本司亦得展布有爲疏通  
鹽課十餘年來商民胥便信哉懲一人而千萬  
人知懼非藉法守以維之乎今錢十一等不鑒  
覆轍必圖罔利欺公吏書不守王章輒敢侮文  
妄議是以焚胥而更國法以奸民而擅利權  
視三尺不啻弁髦州縣不思鹽政成法相與共

守徒事要結人心代爲申請事理已覺悖謬及  
奉憲批曉然知國課之難罷私場之難開宜  
卽悔悞朝捧檄而夕折埥可也乃充抗延不理  
若忿運司之議詳而必求勝串同縣官威逼船  
梢致各商迓竄省城赴愬院道何其恣逞胸臆  
至此充本司所不解也夫以吳綱八之射利滅  
制法誠難貸然不過一土民爾州官制之立見  
歛戢茲則該州上下翕然黨護本司爲遠勢難  
禁禦商人卽遵國法辦課亦誰敢徑入虎穴

力與爭場若不嚴行提究則行鹽之地如延建邵等各郡邑皆相効尤鹽法立見阻壞非獨各商繳引棄迤司官亦當解綬告去二百年成法特可一旦蕩廢乎本司雖奉兩院委解錢糧未敢以離任而忘職掌雖與州官聯居梓里未敢以私情而奪公法若聽其變亂不披肝膽俟繳批復任之日鹽政已弛商人各散安用抱茲空印覩然尸素已乎理合呈乞嚴行該州將錢十

一等并承行吏書解審緣何挾詐妄議擅更

國制卽推諉生員而例不得建言亦明 旨所必  
斥也一一如法究懲庶幾利權總握于朝廷土  
民杜覬覦之念 國法不撓乎州縣婪吏絕狐  
鼠之奸矣具由通詳奉軍門都御史金 詳批  
仰鹽法道提究解報

鹽法道副使李思誠條議八款

一萬曆四十年十二月鹽法道按察司副使李

爲禁私販祛宿弊以清鹺政事照得閩中鹽法  
至今極壞而補苴之法不啻備矣但法久弊生

不無昔是今非甲可乙否本道精心諮訪有可  
以裕課通商者一力擔當惟知執法罔知徇情  
第弊竇多端除另有見聞次第舉行外所有一  
二興革事宜擬合嚴行申飭爲此案仰本司呈  
堂照依款議事理卽便通行水口黃崎二分司  
及倉場閩安竹崎司所等衙門各一體遵照着  
奉行如款內應詳報者查照詳報應禁革者嚴  
行申禁應舉行者卽速舉行毋得視常怠忽如  
有違者定提經承人後究罪仍令各大書告示

曉諭俾知遵守施行

一查得 國課額數以幫爲準缺幫則缺課初猶  
扯東補西終必掣襟露肘况弘隆之初十幫後  
損而六凌夷於四五之間今僅僅四猶不足矣  
豈食指之林林總總不昔若乎皆緣私鹽盛則  
官鹽阻理勢必然但私販之徑百而夾帶之途  
二在外則興販在商則夾帶是已商之夾帶一  
則曰包重重一斤免一斤之課免一斤之費淨  
得一斤之利誰不樂爲一則曰愆期自場運至

南倉風順不過一日未有數日而風不變者乃  
延挨歲月甚過半年以上猶爾不報其情弊顯  
然矣見當幫船數未足前幫調船未回以官附  
私展轉交買幫之不繼贖此之由舊議每包一  
百三十斤夾帶五斤之內者割沒五斤之外者  
全沒成畫昭然柰以全沒律諸商則商商皆可  
沒也沒則無商合無以幫爲準割沒之外計鹽  
多寡卽作正數令其納課商能夾于船之內而  
不能夾于船之外能夾于包之內而不能夾于

包之外船中包中之數俱爲正數則商何利于夾帶而此實可塞矣

一夾帶旣嚴則商之浮費宜省彼孳孳者誰肯以已本利潤他人之囊橐惟有徙業而他之矣又當以恤之法招之許商人指實呈稟本道爲一切裁去不令重困也

一鹽秤查舊例以司官親驗不爲無見而今不然包有鄉秤官秤之說夫秤豈有二乎秤外之餘乃商之飾說而在上誤聽之耳南臺竹崎水口



宜較而一也

一新造鹽船丈量宜慎但船之大小加一寸則可容鹽千斤尺萬而丈億矣船不能改歲而不造但丈量之官多係營求徒知丈船有例而不知船之尺寸稍差其爲漏卮非小自後本道委用俱擇廉能官斷不令以曹丘而得之船少差尺寸定以法重懲不輕貸也

一興販百孔千瘡如鬼如蜮不可究詰或棚主領票而省城之鹽悉係興販或巡司傳送而他人

不敢盤詰或商丁通同而公行貨賣或捏稱無  
犯私鹽當官領賣而任意影射私販或士夫借  
口粧作食鹽而大艘小艇晝夜搬運不已或哨  
兵假緝盜而爲盜諸如此類皆興販之流毒官  
鹽之巨蠹矣自後巡兵以地爲界不得尺寸踰  
越若是者法無赦下流搜獲遡流而上者追究  
各監專責一官官以此定臧否兵以此明賞罰  
兵不足論官肯容奸而損已乎各宜自愛無犯  
也

一捉獲私鹽無論有犯無犯盡歸南倉收貯除各衙門買用之外許失水商人買補毋許正幫搭賣以滋多弊

一捉獲私鹽必究其自何而來今從何往買何竈戶而竈戶日晒鹽斤斗秤者亦須登記簿內某鹽若干賣何商客俱要一一報明不許朦朧以襲因循之弊

一杉板船裝販亦宜查禁俱要編成字號十人一甲十甲一號一人犯禁九家連坐仍立簿三本

一送道一送運司一存場官不時查考甲有甲  
長號有號長一歲一更輪流當直有不公不法  
者許群甲呈首重法處治

福建

道司志卷之十四上終